

Date – 09/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. **National Games vawi 38-na neih laiah, nizan khan Mizoram Taekwondo mipa team chuan Poomsae inelnaah Services (SSCB) hnehin Gold medal an hlawh chhuak.**
2. **Lengpui Airport-a thlawhtheihna tlan kawng a that tawkloh avangin Central Road Research Institute chuan thla 3 hnuah Licence tihtawp sak theih a ni an ti.**
3. **St Pauls Higher Secondary School zirlai Lalnunsangi Ralte, Pawl 10 zirlai chu kum 2025 Pariksha Pe Charcha 8th Edition ah Prime Minister Narendra Modi nen inkawm tura thlan a ni.**
4. **Minister of State for Defence, Ajay Bhatt chuan February 4th atanga 8th, 2025 chhung khan, ni nga chhung atan Riyadh a tlawh a, World Defence Show 2025 chhim turin a tlawh a ni.**

<><><>

GOLD MEDAL

National Games vawi 38-na neih laiah, nizan khan Mizoram Taekwondo mipa team chuan Poomsae inelnaah Services (SSCB) hnehin Gold medal an hlawh chhuak.

Taekwondo Poomsae hi round tinah Poomsae 2 theuh hmanga inelna neih a ni a. Pre-quarter final hi seeded zawn nan hman nghal a niin Mizoram chu SSCB hnuaiah awmin seeded pahnihna an ni a. Knockout round (Quarterfinal) an in hlangkai a.

Quarterfinal-ah Gujarat nen in tum leh in Accuracy leh Presentation-ah te Mizoram chu a chung nung zawk ve ve a. Point 6.732 hmuin Gujarat an hneh a. Semifinal-ah hian Accuracy tha tak Arunachal Pradesh team nen in tumin Mizoram hian point 6.749 an hmu a, point 0.017 chuaha in thlauin Arunachal an hneh zui a ni.

Final-ah hian Services(SSCB) nen an in tum leh a. Service hi 1st Poomsae-ah balance an ti chhiat zawk avangin Mizoram an chungnung a. 2nd Poomsae-a che tha zawk SSCB-in point 6.633 hmu mah se, Mizoram point 6.700 an phak zawh loh avangin Mizoramin Gold medal an la leh ta a ni.

Mizoram hian Gold medal 2 leh Bronze medal 1 an lak tak avang hian Ranking 27-naah a in hlangkai chho ta a ni.

<><><>

LENGPUI AIRPORT

Lengpui Airport-a thlawhtheihna tlan kawng a that tawkloh avangin Central Road Research Institute chuan thla 3 hnuah Licence tihtawp sak theih a ni an ti a, hemi bawhzui hian Mizoram sawrkar chuan Lengpui Airport thlawhtheihna tlan kawng siamthatna tur cheng vbch 80 a ruahman.

MNF Legislature Party leh Lengpui Airport hotute inkawmna-ah he thu hi tarlan niin Aviation hotute chuan thlawhna tlan kawng chu a that tawk loh thu Central Road Research Institute chuan an sawi a ti a, CRRI hotuten Lengpui Airport enkawltute hnenah thlawhtheihna tlan kawng chu siam that anih loh chuan License cancel thlengin hmalak theih anih thu an sawi a, hemi avang hian Mizoram sawrkar chuan February ni 5 khan Lengpui thlawhna tlan kawng siamthat nan hian cheng vbch 80 a ruahman a ni.

Lengpui Airport hotute sawi danin tun dinhmunah thlawhtheihna tlan kawng chu a that zawng tehna PCN 36 a ni mek a, hei hi PCN 55 ah tih san tum a ni tih sawiin hmalakna an kalpui tan thu an sawi a, CRRI hotute sawi danah tuna Airport runway chu thlawhtheihna chetsual hlauhthawnawm anih avang leh mipui tan a him tawkloa an ngaih avangin siam that ngai an ti a, hemi avang hian Mizoram sawrkar chuan siamthatna tur atan cheng vbch 80 a ruahman a ni.

Lengpui Airport hotute sawi danin Lengpui ram huam chin chu teh thin a ni an ti a, kum 2022-a a zau zawng teh ah Airport ram bigha 1997-a zau chu kum 2024-a teh hnuhnun berah bigha 1724.78 a nih thu an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PARIKSHA PE CHARCHA 2025

St Pauls Higher Secondary School zirlai Lalnunsangi Ralte, Pawl 10 zirlai chu kum 2025 Pariksha Pe Charcha 8th Edition ah Prime Minister Narendra Modi nen inkawm tura thlan a ni.

Prime Minister Narendra Modi hova zirna chunchanga inkawmhona Pariksha Pe Charcha ah hian ramchhunga zirlai hrang hrang thlan chuah te an tel thin a, kuminah hian zirlai 100 chuangin Delhi an pan hnuah zirlai 36 chu Prime Minister nena inkawmhona ah hian an tel thei dawn a ni.

Lalnunsangi Ralte chuan Prime Minister kawm tura thlan ani chu lawmawm atih thu sawiin ramchhunga zirna in hma a sawn theih nana ke a penna ah lawmthu hrilh a tum a ti a, hei aia tan la zual zel turin hrilh a tum thu a sawi bawk.

Prime Minister leh zirlaite inkawmna ah hian Narendra Modi chuan ramchhunga zirlai naupangte chu exam avanga an rilru hahna chhawk zangkhai zawngin hun a hman pui thin a, zirlaite bakah zirtirtute leh nu leh Pa ten Prime Minister hi zawhna an zawt thin a, Nikumah chuan January thla

tawpah he hun hi hman a ni a, kuminah chuan Karleh thawhtanni February ni 10 ah neih tura ruahman a ni.

<><><>

KOHHRAN HMEICHHIA

Mizoram Presbyterian Kohhran hnuaia Kohhran Hmeichhia ten Pastor bial hrang hrangah Bial Hmeichhe Inkhawmpui an hman mek a, zanin hian a tiak ang.

Zirtawpni zan khan bial hrang hrangah Palai lawm leh report inkhawm an hman tlangpui a. Bial tin Secretary bakah Bial Secretary ten Inkhawmpui hmasa leh tun inkhawmpui inkara an chetvelna report an pe a ni. Nimin nileng khan bial tinah Rorel a ni a. Zanin thlengin vantlang Pathian Biak inkhawm a awm dawn a ni.

Inkhawmpui hman dan tur hi Bial Kohhran Hmeichhe Committee-in ngaihtuahin a remchan dan anga hman thin a ni a, hei vang hian bial hrang hranga inkhawmpui hman dan pawh a inang vek lo a. Bial thenkhatah thupui thlan bik neiin speaker ten thu an sawi thin a, bial thenkhatah chuan bial hruaituten an thu an insawi chhawk chang pawh a awm thin a. Kristian Chhungkua leh Buhfaithama inelna lawmman hrang hrang sem thin a ni bawk.

<><><>

MNF LEGISLATURE PARTY

MNF Legislature Party Leader Pu Lalchhandama Ralte chuan Mizoram Sawrkar in Lengpui Airport IAF kuta a hlan chuan ram pawl a khawih dawn a ti a, Lengpui Airport hralh chu Mizo mipui tam tak duhloh anih avangin Sawrkar chu in ngaihtuah nawn se a ti.

MNF Legislature Party in nimin khan Lengpui Airport an tlawh a, he hunah hian thusawiin Pu Lalchhandama Ralte chuan Mizoram Airport neih chhun IAF kuta hlan chu eptu party hrang hrang leh tlawmngai pawl bakah Mizo mipui tam tak in an duh lo a ti a, ZPM in kum khat pawh an la enkawl tlin hmaa hralh an tum chu hriatthiam harsa a tih thu a sawi bawk.

Pu Lalchhandama chuan, ZPM in sawrkarna an chan atanga an hmalakna hmasa berah Lengpui Airport chu midang kuta hlan an rel nghal a ti a, Chief Minister Pu Lalduhoma’n Delhi a kal hmasak bera alo haw ah Lengpui airport chu AAI hnenah emaw Adani Group ah hlan tum a ni ang tiin a sawi bawk a, hemi bawhzui hian sorkar chuan Committee te dinin he committee in rawtna a neih angin Cabinet chuan Indian Airforce hnena hlan turin MoU duangtu tur committee an siam a ti a, IAF kuta hlan anih chuan mipui zalenna a bo dawn a ni a ti.

MNF Party hruaitute hian vawiin khan Lengpui airport hotute an kawm a, Airport runway an tlawh bawk a, he hunah hian MNF Legislature Party Leader Pu Lalchhandama Ralte bakah MLA - Pu Lalrintluanga Sailo, Pu L. Rohmingliana, Pu Ramthanmawia, Pu K. Laldawngliana, Pu H. Lalzirliana leh Pu Lalrinsanga Ralte te an tel a ni.

Hetihlai hian Central YMA buatsaihin nizan khan 'Ruihhlo Do infuihtharna hun' Vanapa Hall-ah neih a ni a, he huna kalkhawmte hian Indian

Air Force kuta Lengpui Airport hlan an remtih loh thu resolution siamin an pawm a ni.

<><><>

Minister of State for Defence

Minister of State for Defence, Ajay Bhatt chuan February 4th atanga 8th, 2024 chung khan, ni nga chung atan Riyadh a tlawh a, World Defence Show 2024 chhim turin a tlawh a ni.

He a tlawhna hian, Munitions India Limited leh tualchhung thawhpui pakhat inkarah Memorandum of Understanding ziah a ni a, hei hian India leh Saudi Arabia inkara thawhhona thuk zawk chu a tarlang a ni . He MoU hian, defence lama thawhhona, technology transfer, leh joint production hmalakna tihpunna tura inpekna neih dun a ni. Minister Bhatt chuan he inremna hi ram pahnihte thawhhona thang zel tilangtu a nih thu a sawi. Riyadh a tlawh chung hian Minister Bhatt hian Saudi official pawimawh tak takte nen inbiakna a nei a, ram pahnihte defence lama inzawmna tihchak a pawimawh thu a sawi.

<><><>